

## “Bo Mester Tin Fe”

Kada dia nos ta primi e botónnan enumerá riba telefón, sigur ku nos lo por papia ku un persona alehá di nos. Nos ta sende televishon, pa mira un wega di futbòl ku ta tumando lugá te na Hulanda. Nos ta konfia hende pa no divulgá un sekretonan. Nos ta bebe remedi, keriendo ku e líkido marga lo benefisá nos salú. Nos ta dependé di oloshi pa indiká e ora eksakto. Nos ta manda nos yunan skol, sigur ku e dosentenan lo duna nan informashon balioso. Nos ta konfia outomobilistanan pa keda na nan banda di kaminda. **Kada dia nos tur ta ehersé fe di un òf otro forma!**

“Bo mester tin fe!” ta un frase entoná ku frekuensia ora ta trata ku tópikonan spiritual. Ma si nos puntra, “Kiko ta fe?” hopi kontesta ta leu di nos práktika diario. Un impreshon komún ta ku fe ta “un sintimentu insiertu di siguridat religioso.”

Ma fe ta muchu mas ku sintimentu. **Fe bibliko**—mesko ku fe den bida diario—**ta konfiansa ku ta resultá den akshon**. Bo ta konfia e stul, pesei bo ta sinta riba dje. Apesar di kuantu emoshon bo por tin, bo no ta ehersé fe den e stul te ora ku bo ta sinta. **Fe = konfiansa + akshon!**

“Bo mester tin fe!” Bunita! Ma fe den kiko? Bo por tin fe ku un stul kibrá por wanta bo peso...i tòg kai na suela. Bo por ta sigur ku komiendo tres pida di kreit lo aliviá bo doló di kabes...i tòg peorá! Bo por konfia servisio meteorológiko su boletin ku orkan lo no alkansá nos isla...i tòg pèrdè bo dak i pertenensianan den e bientu fuerte. Bo por kere konseho di un eksperto pa kumpra tal produkto...anto yora lat ta malai. Bo por ta konvensé ku tal number ta gana premio mayo i keda ku kara sushá.

LOKE bo ta konfia por lagábo na kaya, apesar di kuantu fe bo tin. Si bo ta konfia algu inkonfiabel, fe so no ta logra e meta!

Bèrdat, pa yega shelu bo mester tin fe. Pero si bo ta konfia e kos òf persona robes, NUNKA lo bo yega shelu! E lo lagábo na kaya. Hesus a bisa, “*Ami ta e kaminda...ni un hende no ta bin serka e Tata, sino pa medio di Mi*” (Juan 14:6). Si Hesus ta e ÚNIKO kaminda, esei ta ekskluí tur otro ruta pa shelu! **Fe den Buda, Mohamed, Moisés, Pedro, Maria, òf un santu no por prevenibo di bai fièrnu. Hesus SO por hasi esei!**

Talbes bo sa i ta kere esei. Ma bo ta konfia Hesus SO pa skapabo? Kisas bo ta konfia bo misa, boutismo, bo resamentu, lesamentu di Beibel privá, bo bida deboto, bo bon obranan, bo yudansa di hende den nesesidat, èts. Talbes algun di esnan ku ta keda riptí, “Bo mester tin fe!” ta konfia nan fe...nan tin fe den nan fe. Tur esaki ta fe den e kos ROBES. Hesus ta e ÚNIKO kaminda pa shelu! Tur otro ruta—maske kantu fe bo tin—lo lagábo na kaya.

Bo ta BISA ku bo ta kere den Hesus. Palabranan bunita. Ma palabranan no ta salba. **Ta tempu pa stòp di papia so tokante fe i demonstr’é ku bo bida! Kòrda, fe = konfiansa + akshon.**

Na aña 1860, un multitut grandi a wak ora akrobat Charles Blondin a kana riba un kabuya di rèk un distansia di mil pia riba Niagara waterfal. Ora el a logra kan’é, el a puntra si nan ta kere ku e por karga un hende riba su lomba bèk na otro banda. Nan tur a afirmá ku e por. Ma ora el a pidi un hòmber pa subi su lomba, el a nenga! E hòmber a BISA ku e ta kere, ma e no tabata dispuesto pa konfia i aktua. No tabata fe bèrdadero!

Hopi hende na nos isla ta hasi méskos. Nan ta afirmá siertu fakto bíbliko: Hesus ta Dios, El a muri na mi lugá, mi por yega shelu dor di Hesus. Ma nan no ke laga lòs di e otro kosnan ku nan tambe ta konfia—resamentu, boutismo, bon obra, èts. Pa konfia Hesus pa bo salbashon, bo tin ku stòp di konfia TUR OTRO KOS ku bo ta spera lo hasíbo mas aseptabel pa Dios!

Na bispu di un otro aña, kiko lo bo hasi ku Hesus? Lo bo atmití ku bo ta un pekador meresiendo kastigu etèrnu na fièrnu, bira lomba pa ku piká i tur kos ku bo ta konfia pa salbashon (asta kos bon), i bisa Dios ku bo ta konfia Hesus SO pa skapábo di fièrnu? Of lo bo sigui entoná “Bo mester tin fe!” i nunca KONFIA Hesus SO pa bo salbashon i demonstr’é ku bo akshon?